



**Äntwert vum Här Minister fir Energie, Claude Turmes, op d'parlamentaresch Fro n°6640 vum
10. August 2022 vun den éierewäerten Deputéierten Fred Keup an Fernand Kartheiser iwwert de Plan
d'urgence am Gas**

1. Kann den Här Minister präziséieren, wéi eng energiepolitesch Constrainten op Lëtzebuerg zoukéimen, wann d'EU verbindlech Spuerziler festleeë géif?
2. Besteet an deem Zesammenhank d'Gefor, datt een allgemengen Energiepass zu Lëtzebuerg agefouert gëtt, bzw. d'Reglementatioun am Zesammenhank mam bestoenden Energiepass verschäerft gëtt?
3. Kann den Här Minister erklären, ob et am Fall vun enger verbindlecher EU-Veuerdnung zu enger Rationéierung vu Gas, Bensin, Diesel, Mazout an aneren Energiequelle fir Firmen a Privatleit kéint kommen? Wéi géing esou eng Rationéierung funktionéieren a kontrolléiert ginn?
4. Ass am Fall vun enger verbindlecher EU-Veuerdnung ugeduecht, fir déi Smart- Metern, déi vill Leit elo doheem hunn, zum Zweck vun enger Rationéierung vum Energiekonsum oder der Kontroll vum private Konsumverhalten anzesetzen? Wéi wär dat mam Dateschutz kompatibel?

Lëtzebuerg setzt fir de Moment op fräiwëlleg Mesuren fir déi 15% Gasverbrauch an der Referenzperiod vum 1. August 2022 bis den 31. März 2023 (am Verglach zu de 5 Referenzperioden vun de 5 Joren virdrun) anzespueren. Sou ass dat och am EU Reglement 2022/1369 iwwert koordinéiert Moosnamen fir d'Erofssetzen vum Gasverbrauch virgesinn..

D'Memberstaaten mussen d'Ëmsetzung vun de Reduktionsmoosnamen op hirem Territoire reegelméisseg iwwerwaachen a mussen all zwee Méint der europäescher Kommissioun d'Reduktioun vun der Demande an hirem Land matdeelen.

Falls déi europäesch Kommissioun géif feststellen, datt déi fräiwëlleg Mesuren net duer géife goen fir dat Aspuezil europawäit vun 15% bis zum 31. März 2023 z'erreechen, géif si dem europäesche Rot proposéieren fir eng "europäesch Alerte" nom Artikel 5 vum virgenannten europäesche Reglement auszeruffen. Am Fall vun esou enger "europäescher Alerte", wieren d'Memberstaaten verpflichtet fir 15% Gas an der virgenannter Referenzperiod anzespueren an si kéinten gegebenenfalls och bei sech obligatoresch Moosnamen ergräifen fir dat Zil z'erreechen wa si mierken, datt déi fräiwëlleg Mesuren net duer géife goen. Zu Lëtzebuerg géifen esou obligatoresch Moosnamen iwwert e Règlement grand-ducal, deem opgrond vum Artikel 19 vum ëmgeännerten Gesetz vum 1. August 2007 iwwert d'Organisatioun vum Gasmarché geholl gëtt, festgeluecht ginn.

Am Fall vun enger Kris um Gasmarché huet Lëtzebuerg, sou wéi all Memberstaat, en Noutfallplang konform zum EU Reglement Nr. 994/2010 opgestallt, dat spéider duerch d'Reglement 2017/1938 iwwert d'Versuergungssecherheet am Gas ersat ginn ass. Déi éischt Versioun ass vun 2012, an déi aktuell Versioun

vum Oktober 2020. Deen Plang ass aktuell am gaangen ugepasst ze ginn fir der aktueller Situatioun an der eventueller Noutwennegkeet vu méi laangfristegen Engpäss Rechnung ze droen. Den ugepasste Plang muss bis spéitstens Enn Oktober op Bréissel notifiéiert ginn.

Am Noutfallplang ginn méiglech Mesuren, souwuel fräiwëlleger wéi och obligatorescher Natur opgezielt, déi jee no Kontext a Gravitéit vun der Situatioun kéinten aktivéiert gi fir d'Risiken respektiv den Impakt vun der Kris ze reduzéieren oder esouguer ganz ze évitéieren. Eng vun deene Mesuren ass z.B. d'Reduktioun vum Gasverbrauch fir d'Hëtzen bei all de Kategorien vu Verbraucher. Dobäi sinn Haushaltsclienten europäesch als "clients protégés" désignéiert, an dierfen deemno nëmmen da ganz ofgeschalt ginn, wann all aner Clientsgruppen schon ofgeschalt goufen. Dëst schléisst awer net aus, datt och Haushaltsclienten am Fall vun engem Engpass kënnen eng Contributioun leeschten.

Déi national Energiespuercampagne gouf der Öffentlechkeet den 8. September virgestallt an ass e wichtege Deel vun deene Mesuren fir op deen aktuellen Gas-Engpass an Europa ze reagéieren.

Am Fall wou all déi Aspuermoosnamen net sollten duer goen fir déi 15% Reduktioun z'erreechen oder och am Fall vun enger Kris wou kuerzfristeg net méi genuch Gas am System wier fir all Clienten ze beliwveren, gesäit den Noutfallplang d'Aktivatioun vun engem Ofschaltplang ("plan de délestage") vir. Heibäi géifen Clienten no engem festgeluechte Prioritéitprinzip ganz ofgeschalt ginn, ugefaang mat industrielle Clienten. Sollte Versuerungsproblemer trotz Ofschaltung vun der Industrie weider bestoen kéinten och mëttelgrouss an kleng Betriber ofgeschalt ginn.

Wat den Energiepass ugeet, sou sief bemierkt, datt Lëtzebuerg elo schonn mat déi héchsten Ufuerderungen (am Verglach zu aneren EU-Memberlänner) wat d'Energieeffizienz vu Wunn- an Zweckgebaier ugeet, ëmgemat huet an et ass net geplangt des am Kader vun der aktueller Energiekris nach weider ze verschäerfen an et gëtt dozou och keng Ufuerderung vun der EU am Zesammenhang mat verbindlechen Energiespuerzieler.

Wat d'Asetzen vun den Smart Meter fir eng Reduktioun vun Gasfluxen ëmzesetzen ugeet, stellt sech déi Fro net, well dëst technesch net méiglech ass. Och eng Kontroll, ob sech d'Leit un déi geplangte Mesuren halen ass iwwert den Smart Meter technesch net ëmsetzbar.

Lëtzebuerg, den 27. September 2022
(s.) Claude Turmes
Minister fir Energie